

国朝耆献类征初编

國朝著獻類征初編

國朝耆獻類徵初編卷二百七十一目錄

將帥十一

額司泰

伊勒都齊

彭有德

許占魁

鄂齊里

瑚里布

王可臣

曾孫進泰
元孫柄

覺羅豁特

武穆篤

阿賴

國朝耆獻類徵初編卷二百七十一

通奉大夫前署江西巡撫江西布政使司布政使湘陰李桓輯
將帥十一

額司泰

額司泰滿洲鑲白旗人姓富察氏大學士額色赫弟也初事世
祖章皇帝任一等侍衛聖祖仁皇帝康熙三年授鑲白旗蒙古
副都統九年遷護軍統領十二年逆藩吳三桂反上命順承郡
王勒爾錦統師征討以額司泰參贊軍務會侍衛阿爾賽自荊州
還奏賊由貴州陷沅州總兵崔世祿降賊澧辰道梗湖以南半入
於賊總督蔡毓榮亦飛章入告因詔額司泰同護軍統領伊爾

都齊簡精銳先發十三年二月抵荊州 上以常德長沙二郡爲

三楚要地 命額司泰與前鋒統領碩岱都統珠滿移駐守禦值

二郡已爲賊陷仍駐荊州未幾賊將劉之復陶繼智率賊萬餘犯

宜昌營於江之兩岸總兵徐治都告急額司泰乃自荊州移師赴

援與徐治都等率舟師橫江逆擊戰甫接賊潛以三百人率登岸

擾我後我師分擊敗之得賊舟三賊遁走越三日師次岳州界時

三桂踞澧州其黨吳應麒廖進忠柯鐸高起隆踞岳州馬寶張國

柱復率眾二萬自澧州水陸並集並於陸地設鹿角阻我騎兵額

司泰與貝勒察尼將軍尼雅漢定議三圖爲賊門戶令前鋒兵先

奪之以阨其吭繼令護軍驍騎分路堵截且檄綠旗兵奪據城陵

磯及七里橋使賊首尾不相顧至期聞貝勒營吹角額司泰率前
隊戰艦擊賊眾軍以次並進攻毀賊船殲賊萬餘賊退踞七里橋
東木柵乃收兵還營是年冬奉 詔參贊貝勒尙善軍規復岳州
值賊勢猖獗我軍未能進取久相持十五年三月 上諭尙善曰
頃安親王岳樂已復萍鄉醴陵進取長沙逆賊吳三桂遣其黨馬
寶高起隆自岳州赴援賊勢旣分毋坐失機會於是尙善以所部
水陸諸軍令額司泰統率進剿賊船列陣洞庭湖鐵鎖勾連礮火
矢鏃如雨額司泰自率銳卒衝其北令副都統洛什擊其南軍士
皆奪船奮進大敗賊追擊三十餘里賊之踞君山者皆遁獲船五
十二僞印五纛仗盔甲無算擒賊百七十餘人十六年二月卒於

軍先是統師王貝勒屢奏額司泰敗賊功皆得 旨嘉獎俟事平
日議敘至十九年大軍凱旋部議王貝勒大臣征岳州時退縮不
前罪額司泰既病歿應籍家產 上原宥之

右 國史館本傳

伊勒都齊

伊勒都齊姓莽努氏世居察哈爾 太宗文皇帝時來歸隸正黃旗蒙古尋授護軍參領天聰八年七月 上親征明由宣化府入邊伊勒都齊從率所部攻下十二堡八月班師齎 敕先還以入邊功 諭畱守諸貝勒崇德五年六月隨睿親王多爾袞屯田義州敗明騎兵於甯遠九月鄭親王濟爾哈朗統師圍明錦州令伊勒都齊與前鋒統領勞薩等率兵三百設伏高橋北以縱敵弗擊議罰家財半六年復隨鄭親王圍錦州敵兵自松山來犯鑲黃旗汎地伊勒都齊同護軍統領濟什哈擊卻之八年鄭親王証明前屯衛以礮攻毀城堞伊勒都齊率本旗護軍先登取其城敘功

予雲騎尉世職

世祖章皇帝順治元年隨大軍入關敗流賊李

自成追至望都是年冬署護軍統領隨豫親王多鐸剿賊至陝州
距潼關立營自成遣賊眾迎戰賊將劉方亮乘夜劫營伊勒都齊
與護軍統領圖賴奮擊破賊遂克潼關二年四月豫親王多鐸師
定江南至揚州伊勒都齊同護軍統領圖納岱率兵攻城南獲敵
船二百餘尋隨端重親王博洛征浙江敗明總兵王之仁等於平
湖縣追剿至太湖獲船數十大兵既定杭州伊勒都齊與前鋒參
領鄂碩勞罕往偵錢塘江渡口擊敗敵兵三百先是敘入關破流
賊功晉世職騎都尉兼一雲騎尉至是敘平江南功晉三等輕車
都尉三年隨豫親王征叛逃蒙古騰機斯等將追及賊眾還戰伊

勒都齊與都統阿賚先率兵繞出其後俟賊潰遁截擊擒斬甚眾
我兵自圖喇河西行喀爾喀部土謝圖汗之子及碩類汗之子各
率眾邀戰伊勒都齊列陣奮擊敗之獲馬駝無算敘功晉二等輕
車都尉六年隨鄭親王征湖南時明桂王朱由榔之將王進才袁
宗第郝永忠等據沅州靖州伊勒都齊同前鋒統領努三護軍統
領都爾德副都統金維城率兵由武岡進征破進才賊寨九袁宗
第列十寨於洪江南岸伊勒都齊先眾破其五寨賊皆潰遁復分
兵進勦郝永忠攻克黎平府永忠竄遁躡跡至永從孫斬級百餘
獲馬數百七年四月凱旋得 優賚八年擢正黃旗滿洲副都統
九年兼刑部侍郎三遇 恩詔晉爵二等男十年十一月以勦勒

佐領敦達哩岱敏互訐事論敦達哩削職罰鍰敦達哩訟冤得釋
伊勒都齊坐徧徇降爵一等罷侍郎任十七年以疾解副都統任
聖祖仁皇帝康熙十二年諭獎久著勞績諸大臣加伊勒都
齊太子少師是年冬逆藩吳三桂反上命順承郡王勒爾錦師
師赴湖南征討以伊勒都齊爲護軍統領參贊軍務同前鋒統領
碩岱簡精銳先發十三年二月至荊州賊陷常德窺武昌十四年
冬諭責順承郡王駐師踰年未復湖南郡邑罷伊勒都齊參贊
十六年四月卒於軍十九年追論伊勒都齊守武昌時不剿滅虎
渡口賊寇致太平街失陷降世職爲雲騎尉以其弟之子瑪哈蘇

右 國史館本傳

彭有德

彭有德漢軍正黃旗人順治元年由將材從大兵入關二年授山西大同都司尋遷遊擊管右衛參將事五年十二月逆鎮姜瓖叛遣人持書招有德降有德囚其使同城守備王曰吉等陰通賊有廢弁閹某糾眾圍有德署礮石並發有德奮勇突圍奪門出妻妾子女及家屬六十餘人皆遇害馳至英親王阿濟格軍前告瓖叛狀並呈逆書隨奉令同守備王化鳳攻大同城又率兵至右衛招撫賊眾賊於城上施礮穿有德甲不爲動復雲岡威遠等堡六年十月敘大同戰功遷參將管陽和副將事九年十月授浙江杭州副將陽和軍民具狀乞畱下部議准以升銜畱任十一年十一月

傳見書局刻律例
新設大同總兵 詔以有德充補尋加署都督僉事十八年加署
都督同知康熙八年正月因老病乞罷得 旨以原官致仕十六
年十一月卒 賜祭葬如例

右 國史館本傳

許占魁

許占魁陝西蒲城人流寓遼東 世祖章皇帝順治二年隨豫親

王多鐸定江南授陝西陽平關參將六年二月僞侯趙榮貴擁僞

秦王朱森溢聚眾數萬犯階州占魁從關道山碧魚口襲其後而

先與定西將軍李國翰臨鞏總兵王允久期師夾擊遂大破賊眾

陣斬森溢榮貴及僞參將二俘男婦二百餘人十一年七月遷山

西平陽副將時土賊張武擁僞魏王朱秀唐劫掠聞喜縣占魁與

遊擊苗成龍等分路搜剿敗賊於紫家峪斬首百餘級擒朱秀唐

等十五年調陝西西甯副將十六年八月以裁缺調直隸紫荆關

副將 聖祖仁皇帝康熙九年擢延綏總兵官駐榆林十三年陝

西提督王輔臣定邊副將朱龍俱叛應吳三桂十四年三月占魁
舉首朱龍所與逆書疏言臣雖武夫亦聞大義豈肯移忠貞之素
志遺臭名於萬世上嘉獎下部議敘加都督同知銜先是延綏

標兵調征四川者過半至是朱龍等窺榆林防守單弱屢糾眾來
犯占魁遣副將張國彥孫維統遊擊謝鴻儒錢應龍等分路堵剿
又自督兵剿賊綏德既已踞城出拒河濱我兵以礮擊斃賊數百
終未能薄城占魁慮賊襲榆林適張國彥孫維統大破賊兵於懷
遠縣遂率孫維統謝鴻儒等同榆林張國彥回守波羅堡未幾朱
龍煽誘波羅營千總劉尙勇等脅偪張國彥劫奪 敕印國彥禦
賊力竭閣門自焚死叛將孫崇雅引賊眾戕神木道楊三知知縣

孫世譽守備張光斗等遂據神木縣城賊勢熾甚占魁遣子登隆詣闕告急上授登隆鴻臚寺少卿詔趣見駐大同之將軍畢

力克圖副都統覺和託移師援剿占魁復分遣孫維統錢應龍等往隨覺和託兵剿賊擒斬無算魚河響水波羅三路營堡及神木縣俱復畢力克圖進復綏德延安朱龍孫崇雅劉尙勇相繼就擒伏誅殉節之張國彥楊三知等皆賜卹贈榆林從征將弁並

特敕議敘占魁疏言自叛提王輔臣令逆協朱龍竊踞定遠遂陷綏德米脂及葭州神木賊騎竟至歸德堡北至榆林僅二十里許臣集閭城官員士民誓死守城調遣兵馬擊賊潰遁人心始堅嗣因臨洮鞏昌慶陽平涼漢中興安固原相率從逆獨存榆林孤城